

石峯堡紀略

欽定四庫全書

欽定石峯堡紀畧卷十二

六月二十一日甲辰

上命軍機大臣傳諭福康安畢沅曰甘省軍營節次掣
獲賊犯馬文燾馬玉華並盤獲逆黨馬昇貴等已有
旨解送熱河預備訊問但甘省現在辦理軍需存在
需員差委除馬文燾一犯現派法靈阿解送熱河外
其餘應解各犯並將來拿獲賊目應行解送者着傳

諭福康安於起解時俱嚴加鎖鑰派令妥幹員弁解送西安交與畢沅另行遴派妥員轉解熱河如此接替解送甘省差委既不致乏人而沿途亦更可迅速行走并諭阿桂知之

同日傳玉永安奏言臣等於初十日接准

欽差大臣福康安等咨文約定同日進兵臣等即帶兵由鹿鹿山起程向石峯堡前進距石峯堡十五里有餘望見賊人巢穴因在石溝庄地方扎營十二

日據卡倫兵報稱賊匪由石峯堡超越山梁望大
營前來約有千餘人臣等即於辰刻整頓官兵出
營在山梁打仗奮力追殺賊匪等向石峯堡敗走
天色已晚收兵進營查看殺賊百餘名擊傷者一
二百名奪其長鎗鳥鎗號旗什物八十餘件臣等
仍欽遵

諭旨晝夜帶領官兵加意防範保護營寨俟
欽差大臣調撥時即帶兵奮勉勒擊奏入

上命軍機大臣傳諭阿桂福康安曰據傅玉奏由鹿鹿山帶兵赴石峯堡堵截在石溝庄扎營有石峯堡內賊人出來打仗殺賊一百餘名受傷者一二百名等語是賊人竟思於西南一帶竄逸果不出朕之所料傅玉與賊打仗時賊勢尚未窮蹙是以止分其黨羽先為嘗試今見底店賊匪勦盡福康安統大兵搥其巢穴阿桂又帶京兵續至賊衆膽喪必仍於西南一面乘間潛逃此事甚關緊要斷非傅玉等所能妥辦着

傳諭福康安即同舒亮并酌分巴圖魯侍衛章京十
餘人帶兵迅速赴石峯堡西南一路嚴堵或即由彼
進勦其東北一路專交阿桂與海蘭察帶同巴圖魯
侍衛章京等領兵設法進攻摠以四面堵截攻圍務
將賊匪悉數殲擒勿致一人免脫為要

二十二日乙巳福康安奏言臣同海蘭察分路由
底店搜捕敗逃賊匪由雙峴小路行走於十五日
辰刻至石峯堡隨與海蘭察五岱帶同巴圖魯侍

衛率領奮勇官兵前至賊巢察看情形查該處
本在萬山之中而石峯堡又高踞峯頂四面有山
圍繞形勢實屬險峻賊匪於石峯堡後面及左右
山梁剗立營盤帳房密布官兵攻勦祇有北面一
路可進而溝壑重疊一時驟難深入臣與海蘭察
相度地勢於賊營對面山梁將官兵分布整齊以
備乘機進逼維時賊營內遣人赴陣前口稱堡內
馬阿渾張阿渾俱欲率衆投順惟有大通馬阿渾

不肯求官兵暫緩進攻等語臣查賊匪敢於如此猖獗不法雖寸磔不足敵辜今既有乞降之意正可因其投出生擒解送不妨權宜允准但窺其情狀甚屬游移明係緩兵之計必當先示兵威俾賊人望風震懾臣與海蘭察隨令巴圖魯侍衛等率領老教回兵綠營奮勇兵阿拉善兵直進前撲搶上頭層山礮賊人亦於山梁施放烏鎗時出時沒亦不敢上前接仗臣揣度賊衆雖有數千其氣已

金定日歷全書 卷十二
餒即鳥鎗亦不過數桿特因有險可守負隅延喘
此次官兵初到原係偵探賊踪不令深入又天色
漸晚正值雨雹交作因令我兵以次撤回賊見我
兵撤動隨有數百人由山礮下墜捨命前撲官兵
屹立不動已圖魯侍衛等鎗箭齊發殺死賊人數
十名賊始行竄去官兵於賊堡對面各山梁安營
放卡俾聲勢聯絡即日相機合力進攻以期迅速
集事再據傅玉咨報賊匪五六百人於十二日攻

撲鹿鹿山軍營官兵奮勇擊退賊匪殺賊數十人
得獲器械甚多等因查傳玉所駐鹿鹿山係石峯
堡東南相隔二十餘里亦可牽綴賊勢現在知會
於進兵時一齊攻勦再查白銀廠滋事賊匪分竄
西番窰黑矺塔井等處前經派署靖遠協副將玉
柱帶兵搜捕茲據玉柱稟稱六月初九日有涼州
松山營守備福泰帶兵赴鷹窩石搜捕逆回抵白
楊嶺劄營步兵尚未到齊即遇賊百餘人前來冲

鞏守備福泰署守備夏治莊浪營千總趙良樞外
委秦玉俱已被害兵丁陣亡三十餘名該署副將
帶兵趕到與賊接仗殺死賊人七名帶傷賊人十
餘名賊始遁避現在帶兵搜捕等語查白楊嶺賊
匪人數雖少若不迅速撲滅恐又致蔓延更屬不
成事鞏現經添派兵一千名前往搜捕但玉柱亦
非出色之員辦理此事未能妥協必得大員統率
臣酌量於現在軍營之總兵內派延綏鎮策卜坦

前往督率查拿務期勒捕淨盡

同日馮光熊奏言前奉督臣李侍堯飭知在安定
拿獲匪犯馬德供出省城橋門外有回匪馬元馬
達弟子俱係通賊要犯臣隨督率蘭州府知府張
燮皋蘭縣知縣丁淮瑩將馬元一犯立時拿獲惟
馬達弟子訪查並無其人隨委員先將馬元嚴審
日又親提究訊據供馬德原係素日認識本年三
月內曾約其同入邪教該犯當即拒絕並未允從

等語臣查馬元既供與馬德認識其平日往來謀約自屬實情且馬德曾經邀伊入夥該犯並不稟首顯係知情但詰其有無被誘之人該犯終不吐實如將該犯即行正法轉致被誘之人得以漏網臣一面督飭府縣將馬達弟子密跡查拿務獲並將馬元嚴行收禁以期徹底根究並飭令省城內外關廂原派官兵逐細盤詰並通飭各屬一體嚴查除臣前經

奏明拿獲竄匪已經正法之李應登等犯外復經拿獲
營外來形跡可疑道士汪本信一犯係馬營被脇從
逆希圖來省煽誘因立時拿獲尚無被誘之人臣
隨稟明督臣將汪本信業已正法訖又續獲竄匪
馬良伏馬守印馬守全哈生觀馬如才馬俊等六
名均訊係被脇從逆之犯稟明督臣即請正法又
拏獲應行緣坐之張有哈太哈舉馬云馬良等五
犯現在審明分別辦理均奏入

上命軍機大臣傳諭阿桂福康安策卜坦曰前因五岱等前進石峯堡地形圖內西南一面係傅玉扎營處所恐其照料未周曾傳諭福康安同舒亮等帶兵親赴該處堵截進攻矣本日福康安奏到石峯堡賊人情形閱其所繪圖內傅玉等營盤竟轉在東南一面與舊圖方向全差福康安等現帶兵由北面進攻正當喫緊之時且勢亦難繞至該處朕卽次所降諭旨止就原本圖內情形遙為懸揣福康安日在朕前知

朕辦理一切從不肯稍執已見况當行軍之際福康
安必能仰體朕懷酌籌萬善不至拘泥前旨捨近而
圖遠也但就所進圖內形勢而論現在最關緊要者
係賊營東面及石峯堡之西南兩面並無防堵之兵
倘賊乘虛由東復竄至靜寧或由西南又至通渭等
處滋擾深為可慮何以福康安等並未籌計及此着
傳諭阿桂福康安務宜於此等處所倍加留心防堵
勿稍大意而傳玉等營盤亦仍慮其兵單已於圖內

用硃筆詳細批示着發交阿桂福康安閱看令其遵照逐一籌辦為要並着另行放寬繪圖呈覽至摺內所稱官兵進逼賊營賊遣人赴陣前口稱堡內馬阿渾張阿渾俱欲率眾投降惟有大通馬阿渾不肯求官兵暫緩進攻等語賊既遣人乞降福康安等如何向其曉諭何不揮箭令回以奪其魄至賊人果欲投降何以見官兵撤動時尚敢捨命前撲且馬阿渾張阿渾俱欲率眾投順大通馬阿渾一人不肯何難將

伊擒獻送至軍前投首此明係賊人說計故設此言
以緩官軍進攻希冀乘隙侵犯並為逃竄之地阿桂
福康安萬不可墮其奸計即使賊人計窮說稱縛獻
大通馬阿渾亦不可信受降如受敵必當慎之又慎
以防其說降生變也又奏稱白楊嶺賊匪恐王柱辦
理未能妥協現今策卜坦帶兵一千名前往督率查
拏等語白楊嶺賊匪既經福康安派總兵策卜坦帶
兵前往查拏此事即專交策卜坦在彼辦理務期速

行撲滅並令該鎮將掣獲之賊就近嚴審究出黨羽
即可按名擒捕務期淨盡孽種勿任一人漏網倘有
不實不盡惟該鎮是問又據馮光熊奏掣獲通賊之
馬元一犯親提究訊惟稱馬德曾約其同入邪教伊
並未允從而於被誘之人仍堅不吐實其馬達弟子
訪查並無其人等語馬元既與馬德認識且匪犯曾
邀伊入夥顯屬賊人黨羽其馬德所欲煽誘之人伊
亦斷無不知之理該犯到案仍敢茹刑不吐尤屬可

惡或即係馬明心之族屬亦未可定着傳諭馮光熊
即將該犯解赴阿桂福康安軍營設法刑訊務究出
該犯來歷及從賊確情并馬德等所煽誘之人一併
查拿嚴辦毋得任其狡展其馬達弟子一犯仍令馮
光熊選派精細兵役設法購線嚴拿務獲

二十三日丙午

上命軍機大臣傳諭阿桂福康安曰昨見福康安所進
圖內西南一面及賊營東首並無防堵之兵而溝壑

處所似有可行路徑即傳玉一路亦慮其人本無用
兵力單弱倘賊復由東竄至靜寧或由西南竄至通
渭伏羌等處雖斷不至如從前之勾結蔓延而搜捕
究覺費力且於沿途村莊未免復行滋擾着再傳諭
阿桂福康安會同熟籌妥辦務派大員幫助傳玉一
路及東面賊人出路逐一設法堵截並不可令賊潛
出取水及匪徒等為之暗送糧食致賊得資接濟迂
延日久為要至石峯堡地既險要自應相幾慎重進

勦閱圖內石峯堡迤東山梁上有賊營四處官兵何不先由此攻勦將此四營佔據則賊人咽喉已斷更無可出之路並着阿桂福康安酌量辦理又石峯堡為向來險隘之地逆回於上年公然將舊堡重修整固訂期起事實屬罪大惡極務須悉數殲擒斷不可致有一人漏網即前此石峯堡底店逸出之賊亦當實力搜捕按名拿獲概予駢誅而地方文武各官於舊有險隘被賊重修置若罔聞阿桂福康安必須遵前

旨據實查叅治罪况賊人既預蓄逆謀則此外被其煽誘勾合者自不一而足即如馬文燾為底店從逆首犯其手下四匪尚有千餘人其大通馬阿渾係現在賊營首犯因何以大通為號是否係大通縣之人如該犯係大通人則其黨羽居住大通者必多即田五雖已自戕其所居小山地方黨羽亦必不少阿桂福康安總當趁此兵力詳細查究並遵前旨勘明各該犯家內是否有如馬昇貴等開挖地窖之事逐一

履勘輟轉跟究盡法懲治務使孽根盡絕不致再生
事端至現在賊勢已感斷無慮其竄入沂隴一帶敷
倫泰福敏泰是否應各回本任之處着再傳諭阿桂
福康安酌量現在情形如果無須敷倫泰等在彼帶
兵防堵即一面奏聞一面行知撤回

二十六日巳酉福康安奏言臣等於十五日至石
峯堡即帶兵前赴賊巢相度情形賊匪迎拒即乘
勢勦殺十六日黎明臣與海蘭察五岱帶同巴圖

魯侍衛率領奮勇官兵阿拉善兵老教回兵分路
進攻賊匪見官兵進逼俱各棄營遁回石峯堡官
兵隨即奪得賊人大營四座卡營十餘處收獲帳
房器械甚多乘勢進撲賊匪不敢出拒預於堡外
挑挖深溝藏匿壕內施放烏鎗並時有數十人在
堡外行走意欲誑誘我軍墮其奸計臣與海蘭察
等不令官兵輕進恐有損傷轉失威重相持至晚
又值雷雨交作因令撤兵即於賊匪所佔各山梁

罕立營盤十七日臣與五岱旺沁班巴爾督率官
兵直至堡前賊人仍不敢接仗惟據險自守海蘭
察帶同巴圖魯侍衛十餘人直下山溝過河迨至
賊堡西南又遶至東北將石峯堡四面形勢周圍
看視於可以安兵設卡處所察探明悉約沿堡行
數十里申刻始回大營臣與海蘭察五岱公同熟
商賊人佔據石峯堡為負隅死守之計若竟從堡
前進撲非不可直搗賊堡但賊堡四面亂山環遶

連亘數十里且堡後皆係懸崖峭壁我兵攀援而上其勢甚難而賊人乘間逃出較易為力該處路徑叢雜處處可通一經竄逸無從堵截况屢奉

訓諭指示明切總以嚴防後路勿使賊人逃竄為要何敢不凜遵妥辦此時要着必先扼要放卡斷其水道並周圍刨挖溝壕使賊人無路竄逸方能制其死命現已於石峯堡東南山梁設營數處拿至溝底再於石峯堡之西南山腿安營三處即可接至

黑風墩山梁直達鹿鹿山傳玉永安所駐軍營會
合聯絡并多放卡座嚴密偵探一面開挖溝壕設
法絕斷賊人水道使其不攻自潰計川省屯練亦
即日可到該兵丁等步戰輕捷善於攻撲合力進
勦賊匪自成釜底游魂斷不能苟延殘喘至底店
敗逃賊匪零星竄逸所在皆有即現在石峯堡內
賊人亦難保無乘間竄出者查馬家堡地方係從
前賊人屯聚之所形勢亦屬險峻臣已派叅將阿

穆呼朗帶兵五百名以三百名駐劄馬家堡要路
防範堵截以二百名往出溝搜捕又派領隊大臣
噶塔布侍衛永福帶領寧夏阿拉善兵二百名赴
馬家堡等處分路追捕並飛飭安定會寧等州縣
及將備等選派兵役於各要隘嚴密堵截如有疎
玩縱逸者即行嚴叅治罪又靖遠所屬地方亦有
零星賊匪潛匿滋事該縣距省較近已札令藩司
馮光熊督率所屬實力查拿再白楊嶺鷹窩石伏

羌城外之白馬庄俱有賊回數十人或百餘人在
彼屯聚現派總兵策卜坦吉蘭泰帶兵分投前往
搜捕總之賊人巢穴一傾餘黨自立見瓦解無難
勦除淨盡連日官兵搜山拿獲及村鎮百姓擒縛
解送賊匪共有六十餘名內有回民擒送者四名
俱經審明正法并各賞給銀牌以示鼓勵並遍行
出示各州縣村鎮令百姓協力搜緝以期勿留餘
孽再查鹿鹿山在石峰堡東南相距二十餘里賊

人前於該處扎營與石峯堡互相聯絡彼時傅玉
在黑風墩與賊相對掎營迨十七日賊人乘霧遁
去由烏家坪竄往伏羌等處傅玉始移駐鹿鹿山
以牽綴賊勢賊人見我軍屯駐山上形勢相逼是
以於本月十二日率衆攻撲經傅玉等竭力抵禦
自辰至戌殺賊百餘賊衆始行退去是傅玉等在
該處屯扎尚非坐守空山但賊人自伏羌竄回石
峯堡雖不經由鹿鹿山傅玉等亦應派兵偵探堵

截乃任其往來一無籌畫實難辭咎臣不敢稍存
掩飾謹查明據實陳

奏

福康安又奏言臣查甘省逆回不法自乾隆四十
六年勦滅蘓四十三以後所有斷除新教查拿餘
孽係李侍堯專責乃首逆田五陰謀不軌已有二
三年之久且至靖遠哈得成哈彥家商同謀逆竟
公然於禮拜寺齊集衆新教回人告知糾合情節

是該犯等蓄謀已非一日聚衆又非一人旗幟號
衣帳房器械種種齊備李侍堯身任封圻平日漫
不經心毫無覺察豢賊養癰釀成事變此李侍堯
玩愒貽悞之罪也至賊匪起事其始原不過數百
人及田五中傷自戕餘賊自當渙散如果李侍堯
迅速親赴該處會同剛塔等設法實力剿捕早可
完結乃李侍堯以審辦賊匪為名安住靖遠十餘
日遷延觀望及賊已竄逸屢奉

諭旨訓飭始移至安定仍思於賊踪不到之處駐劄畏
蕙不前以致軍營無人統攝全不上緊認真辦理
賊匪得以乘間四出到處煽誘勾結愈聚愈多蔓
延猖獗攻擾城池劫掠村庄肆行無忌此李侍堯
懦怯貽誤之罪也至傅玉所奏賊匪於上年五月
修理石峯堡及衆回人定於本年五月初五日起
事各緣由臣至石峯堡詳詢附近居民賊匪於四
十六年即修理石峯堡上年五月又加葺治整固

而各處逆回訂期於本年五月五日起事亦衆所共知李侍堯豈竟毫無見聞乃屢次摺內總未奏及是其有心迴護避重就輕預存支飾難逃

聖明洞鑒且李侍堯不但於勦賊機宜種種玩悞即一切籌辦供支馬匹草料及軍火器械等事亦復委之兩司伊竟毫無主見又鞏秦階道張廷桂於三月告病李侍堯並不委員接署以致要缺久懸當地方多事之時無人稽查彈壓是李侍堯於地方

事務亦多闡冗臣前已據實叅奏查李侍堯本係
身獲重譴之人蒙

皇上棄瑕錄用自當倍加感激實心任事乃既不能整
飭防範於前又復迴獲欺飾於後實屬負

恩債事革職不足以蔽辜應遵

旨將李侍堯革職拿問速解熱河以備訊問派委安肅
道鳳翔遊擊懷塔哈押解起程飭令沿途小心防
範並行知經過各省督撫一體委員防護毋致畏

罪自戕其貽悞失事之地方文武各官俟詳悉查明
據實叅奏革職拿問嚴審治罪至剛塔於賊匪竄
入馬家堡時即使所帶官兵無多不能堵截後路
亦應嚴密偵緝賊踪竄往何處帶兵星速遶出前
路迎截乃剛塔並不籌計及此圍守空山縱賊潛
逃又復輟轉耽延迨賊遠颺始帶兵尾追以致賊
人四出勾結日益滋蔓劫掠地方擾害良民且於
賊人攻破通渭縣城及在靜寧隆德滋擾之處毫

無策應種種貽誤其罪實無可逭現已遵

旨將剛塔革職拿問派委西安理事同知伍靈阿遊擊

毛大鳳沿途小心管押解交刑部治罪再臣一到

軍營時本即應將李侍堯剛塔拿問起解緣現在

道府大員各有應辦緊要事件無可差委安肅道

鳳翔臣又先委令赴鞏昌一帶查辦撫卹事宜茲

又委員更換檄調前來是以稍遲又伍靈阿係西

安理事同知因甘省丞倅內現無可委之員遠伍

靈阿解銀來甘是以就近派委均奏入

上命軍機大臣傳諭阿桂福康安曰前閱福康安所進
圖內石峯堡迤東有賊營四處當經諭令福康安何
不佔此四營則賊無可去之路今據奏到奪得賊人
大營四座正與朕前降諭旨相合至所稱此時要着
必先扼要放卡斷其水道並週圍剗挖溝壕使賊無
路竄逸方能制其死命現於石峯堡東南山梁設營
數處拿至溝底再於石峯堡西南山腿安營三處即

可接至黑風墩山梁直達傅玉等軍營會合聯絡等語並另據繪圖進呈閱之一目了然與朕前次發去硃筆原圖脗合辦理俱中竅要此時賊匪已成釜底游魂官兵轉不必輕於前進以致或有損傷惟當嚴密防範堵截毋任一名兇脫為要即為時畧久勦除自更淨盡况阿桂帶領京兵暨保寧所統屯練降番日內早已到彼合力攻圍亦無難剋期歲事佇待捷音之至至白楊嶺等處逆回想亦係底店石峯堡馬

家堡迸出之賊自應分兵往捕速期撲滅但策卜坦
吉蘭泰二人向未經歷戎行况綠營兵丁又不如京
兵之嫻習弓馬着傳諭阿桂福康安即於巴圖魯侍
衛內選派精細諳練者數員並於復興所帶京兵內
每處派撥二百名令其帶往幫同策卜坦吉蘭泰上
緊搜捕自更得力其馮光熊續調之甘涼等處兵丁
亦當暫緩撤回以供搜捕堵截之用此次回匪等訂
期起事早蓄逆謀因舉首有人田五等遂倉猝生變

迨竄往馬家堡時若剛塔等能嚴防後路及早完結
則其餘勾結之匪衆聞風斂跡逆形未露轉難查辦
而李侍堯剛塔仍然安於本任或待至一二年後又
不能保無蠢動之事彼時逆謀愈久勾結轉多殲除
更為不易今因馬鬍子等翻山逃遁而石峯堡底店
之賊遂紛紛接應經官兵以次勦捕遂使回匪逆謀
畢露轉得徹底根查萌芽淨盡從此永不至再生事
端此實仰荷

上天嘉祐朕轉輟思維益深敬畏又據奏稱詢之石峯堡附近居民賊匪於四十六年即修理石峯堡上年五月又加葺治整固衆所共知等語是此事李侍堯玩愒貽誤而剛塔在馬家堡縱賊之罪亦無可逭已令軍機大臣劄飭解員鳳翔等將伊二人迅速押赴熱河審訊治罪但賊匪似此逆蹟昭彰附近居民既已共見提督大員自有應得之咎而地方文武員弁何至毫無覺察稟報以致養癰貽患着阿桂福康安務

即查明賊匪修理石峯堡時係何員任內之事即將
貽誤之道府州縣並專管之武職營汛各員一面叅
奏一面拿問亦迅速解赴熱河治罪

臣等謹按行軍制勝在乎扼要爭先周防嚴密
必使無隙可抵方為計出萬全我

皇上前以福康安所進圖內石峯堡迤東及西南一面
未有防禦之兵慮賊人乘虛竄逸

諭令佔取賊營斷絕水道數千里外情形如燭照數計

迨福康安續奏奪得賊營四座接至黑風墩山
梁與鹿鹿山軍營聲勢聯絡先籌勝算早已在
聖明指掌之間益仰

神機廣運故諸臣得以凜遵集事功成迅速也

同日

上諭內閣曰官兵進勦石峯堡賊匪即日可期殲滅福
康安相度機宜調度有方海蘭察督率進攻倍為奮
勉五岱及旺沁班巴爾亦甚出力福康安海蘭察着

賞給御用玉牒各一枚大荷包一對小荷包二對旺
沁班巴爾着賞給御用大荷包一對小荷包二對五
岱着賞給御用大荷包一對小荷包一對福康安等
尤宜各加鼓勵迅速勦辦無使賊匪一名免脫

上又諭內閣曰前曾加恩將海蘭察之子安祿授為三
等侍衛此次海蘭察進勦底店等處賊匪踴躍奮勉
伊子安祿着授為二等侍衛在乾清門學習行走

同日福康安又奏言臣等率領官兵自隆德前進

將底店賊匪侵佔地方盡行攻復所有巴圖魯侍衛章京等帶兵進攻搜拿各處山溝曲徑殲戮賊衆連四晝夜迫近石峯堡賊巢佔取營柵實屬勇往出力內有超衆奮勉之員理合查明懇請

皇上加恩以示鼓勵奏入

上諭內閣曰此次巴圖魯侍衛章京兵丁等竭力殲賊勤勞奮勉甚屬可嘉乾清門侍衛巴圖魯泰斐英阿福寧護軍恭領巴圖魯阿滿泰俱着賞給副都統職

銜乾清門侍衛巴圖魯額爾登保着授為二等侍衛
萬濟柰着賞給哲克敦巴圖魯傅克精額着賞給奇
成額巴圖魯奇成保着賞給法施尚阿巴圖魯武韶
着賞給努塔巴圖魯珠爾杭阿着賞給希里圖巴圖
魯藍翎侍衛色靈額着賞給清連巴圖魯並各照例
賞銀一百兩三等侍衛遜濟奈藍翎侍衛佟保克星
額俱着授為二等侍衛委置烏鎗護軍叅領達延太
着授為副護軍叅領健銳營藍翎長德寧親軍滿柱

前峯薩隆保俱着遇有本營護軍校缺出即行補授
上又諭內閣曰據福康安奏阿拉善公伍爾圖納遜佐
領鍾呢於進剿底店等賊匪時均各奮勇打仗俱着
加恩賞戴花翎又總兵蘓靈候補遊擊德海及千總
等員俱奮勇勦賊蘓靈德海着加恩賞戴花翎千總
喬福祿着補授守備外委馬敷采着補授把總以示
鼓勵

同日福康安又奏言甘省自益茶靖遠通渭伏羌

以至靖寧隆德華亭秦安會寧安定等處凡逆回
所過民人俱被荼毒仰蒙

聖主念切痾瘼屢降

恩旨令將被難良民先行查明優予撫卹並蠲免本年
額賦臣現已謄黃曉示一面遴派幹員前往各屬
安撫招徠散給口糧並查明傷斃人口焚毀房屋
妥為撫卹無使一夫失所以期仰副

皇上惠愛黎元至意惟是賊人滋擾之時居民惶懼紛

紛逃避商賈罕通市集米糧希少以致糧價增昂
即未經被賊之民人亦覺艱於糴食近即據伏羌
縣稟報五月十八日賊匪攻城焚掠關廟鄉間糧
石不能進城必須官糧糴賣以資接濟該縣一面
詳明一面開倉照市價一兩一錢二分二厘之數
大加酌減以每石九錢出糴於賊退之日停止計
共糴過倉斗小麥一千四百餘石經藩司查係實
在情形詳請准其以每石九錢報糴並請各屬內

如靜寧隆德等州縣有必須開倉平糶以濟民食者由該管道府確核情形據實報明一體辦理等情臣查例載平糶倉糧豐年每石照市價減銀五分歉年減價一錢若歉歲米價過昂必應大加酌減者該督撫確核奏

聞一面發糶等語今伏羌出糶糧石較時價每石減銀二錢二分三厘與例不符但當賊人攻擾之時小民糶食惟艱自難拘泥常例既據該司查明實在

情形自應據實

奏明將該縣糶過小麥一千四百餘石准其照每石九錢之數核報其餘被賊之處如靜寧隆德等州縣亦應如該司所請一體核實酌減出糶以廣

皇仁仍飭該管道府隨時加意稽查如有糶多報少藉圖侵冒者即行據實揭報以憑嚴叅奏入

上諭內閣曰前因甘省逆回不法擾害地方曾降旨令福康安查明被難良民酌量撫卹並將該省本年應

徵錢糧概行豁免本日據福康安奏現在該省市集
糧價較昂其伏羌一縣已據該縣開倉減價出糶其
餘靜寧隆德等州縣曾經賊人經過處所亦應一體
核實酌減出糶等語向來出糶倉糧每以年成豐歉
照市價量為酌減今該省因賊人滋擾小民糶食維
艱安可復拘常例辦理着福康安即將應行出糶各
地方一體核查照例價大加酌減出糶期於民食有
濟並着嚴飭該管道府加意稽查如有糶多報少侵

冒情弊即將經手之員嚴叅治罪

二十七日庚戌

上諭內閣曰李侍堯久任封疆歷鍊地方事務數十年受朕恩眷最深迨調任雲貴總督後有收受廠銀等事一經發覺即將伊革職拿問治罪核其情節雖非近年王亶望陳輝祖圖忝郝碩等之貪婪賄贖敗檢營私者可比但其簞簋不飭已隳名節而損廉隅其時彙內外臣工之奏將李侍堯加恩暫緩典刑適因

甘省有蘓四十三之事需人辦理善後事宜一時總督驟不得人李侍堯究屬明白能事是以復將伊補授陝甘總督朕於李侍堯破格加恩原欲其倍加策勵查辦邪教安靖地方以贖前愆李侍堯稍有人心宜何如感激奮勉仰答朕恩乃本年回民田五於小山起事作逆李侍堯並不親帶兵丁設法勦捕彼時尚得以審辦賊黨籌畫軍餉為名迨賊於馬家堡翻山逃遁伊仍逗遛靖遠軍營統攝無人賊遂肆行竄

逸勾結經朕於五月十二三十四等日屢次飭諭
始行移駐安定仍與賊踪遙遠以致賊黨蔓延到處
煽誘攻城掠堡擾害良民是李侍堯之畏葸遷延實
為失機債事賊人於四十六年即已修理石峯堡上
年五月又加葺治整固且田五陰謀不軌公然糾眾
聚集禮拜寺同商謀逆一切旗幟號衣帳房器械種
種齊備足見逆謀已有三四年之久李侍堯安坐省
城竟同聾瞶是其驕賊養癰釀成事變李侍堯之罪

百喙難辭此事辨理始終貽悞卽李侍堯平日如勒
爾謹之庸懦昏曠尚不能曲宥其罪况李侍堯在各
省總督中素稱明白能事人所共知朕之棄瑕錄用
亦因其尚有才能冀其感恩出力乃竟於地方大事
貽悞至此朕更不能曲為之解抑且深自引咎愧恨
也至剛塔身任提督於賊匪起事時未能卽時撲滅
及移駐馬家堡復為賊人誑騙致令翻山逃竄四出
滋擾惟知在後尾追毫無籌畫其罪實無可逭所有

福康安叅奏李侍堯剛塔之處俱係實在情節諒伊
等亦無能委卸着將原摺發交留京王大臣會同大
學士九卿科道核議定擬具奏

欽定石峯堡紀畧卷十二

欽定四庫全書

欽定石峯堡紀畧卷十三

六月二十九日壬子福康安奏言臣與海蘭察五
岱旺沁班巴爾等帶同巴圖魯侍衛督率官兵直
至石峯堡前進攻賊人不敢出堡迎拒仍於壕內
藏匿死守查官兵所佔各山梁拿立營盤周圍石
峯堡約有數十里除山勢陡險溝壑峭立賊匪不
能越過外其餘兩營中間空處尚多恐賊人從此

竄越現又抽掣兵丁多放卡座開挖溝壕以期益
加嚴密至賊人取水係在石峯堡西南礮下河甚
寬廣貼近堡邊我兵尚不能進前斷絕現選派好
鎗手在彼伺賊人下礮即放鎗擊打臣等公同商
酌惟有將石峯堡東南山腿佔得即可一面設法
斷其水道一面乘勢進逼賊巢無難制其死命但
此係賊人最要處所必拚命抵禦官兵仰攻恐一
時不能得手必須整頓兵力計出萬全現在保寧

成德帶領屯土兵丁已於二十一二日陸續到齊
該兵丁等攀陟山路是其所長且又善於攻撲原
擬稍為休息即合力進剿而賊人詭詐亦料及官
兵必來攻佔隨於二十二日有賊人聚集山梁創
挖溝壕意欲拿卡臣與海蘭察商酌乘此賊人不
備分兵進攻可以痛加截殺因與旺沁班巴爾保
寧成德蘇靈法靈阿泰斐英阿福寧等帶同巴圖
魯侍衛章京率領屯練及各營奮勇官兵分路上

攻賊見我兵進撲勢猛拚死抵禦而堡內賊匪亦紛紛接應下壓數次我兵奮勇直前鎗箭齊發殺死賊人百餘名賊始遁回堡內藏匿壕中放鎗投石竭力抵禦惟時官兵已至壕邊因其所挖壕溝寬深一時不能越過恐久站多有損傷是以徐徐撤回此次打仗屯練陣亡一名帶傷官兵數名雖未能趁勢攻得賊堡然邊截剿殺已足喪賊人之膽至連日各營官兵搜獲及百姓擒獲賊匪男婦

一百餘名又華亭西和秦安等縣盤獲賊匪五十餘名除訊明無關緊要即行正法外內有賊目馬壯父子及稍悉賊情數名暫留訊明起解

福康安又奏言查固原州回匪馬昇貴馬漢龍於靠城屋內私挖地窖一案經前督臣李侍堯飭委平慶道沈鳴皋提犯究訊茲據該道嚴加刑訊錄供詳報緣馬昇貴與逆犯田五素相熟識私習邪教自四十六年查禁之後仍與田五往來本年閏

三月內田五糾合謀逆馬昇貴與伊子馬漢龍均
允從入夥因伊孫馬如林馬如海現充營兵恐將
逆謀漏洩並未告知該犯隨令伊婿王舍而巴等
將院內堆糞地窖開挖寬深以便起事時藏匿家
口衣物馬漢龍亦於所居院內開挖土井預備藏
匿衣物並非潛通地道等情並將該州所繪地窖
圖樣呈送前來臣詳加閱看馬昇貴於關廂壕外
開設駝廠馬漢龍住居關廂相距三百餘丈中有

城壕民房間隔非一時所能開挖通連但馬昇貴
膽敢與逆犯田五私習邪教往來糾合與伊子馬
漢龍均允從入夥逆跡顯然是其開挖地窖土井
必另有詭詐情弊且據圖開馬昇貴所挖地窖進
長三丈五尺除供出伊塔王舍而巴等幫同開挖
之人均應逐一嚴究從重辦理又所供伊孫馬如
林馬如海現充營兵並未告知之處亦不足信臣
現飭臬司陳步瀛親提各犯嚴加刑鞠並委員赴

該處覆加踏勘務令從實吐供毋任絲毫狡展至
馬昇貴等與逆犯田五傳習邪教交通謀逆李侍
堯漫無覺察其罪實無可逭該州知州於所屬回
民謀為不軌置若罔聞亦應嚴叅治罪臣已飭令
臬司陳步瀛詳晰訊明年月並將此案是否係現
任知州王琮盤獲抑係該州已經抵任事後查拿
及並非王琮盤獲之處逐一查訊明確再行據實
具奏

福康安又奏言底店武舉馬文燾率衆從逆攻擾
城池剽掠村莊實屬罪大惡極原不得因其悔過
投順稍為寬減臣前欲解散賊黨是以權宜允准

留於軍營時加防範俟剿滅賊匪即行解送熱河
預備審訊臣曾面訊該犯以伊名列武榜身受

國恩何竟甘心從逆據供實係被賊逼迫無奈順從
曾於五月十七日遣人將危急苦情於隆德縣案
下稟過等語臣復詢之隆德縣知縣鍾潤據稱實

有此事並將馬文燾原稟呈出問以曾否稟過前任督臣李侍堯則稱馬文燾已於十八日率衆從逆是以因循未稟等語臣思該縣如果將馬文燾赴訴情節稟知督提或設法撫諭慰安尚不至公然肆逆為賊人又添羽翼乃沉擱不報實屬昏瞶糊塗貽誤要務應請

旨將隆德縣知縣鍾潤革職拿問以便審明治罪所遺

員缺前奉

諭旨候補吏目朱爾漢以佐襍微員能將靖遠縣內應
賊犯用計妥速按名擒拿甚屬可嘉事定後即將該
吏目出力之處聲明送部引見此時若有知縣缺出
即可委署欽此該員現已調至軍營臣留心察看甚
有才幹係佐襍中出色之員應即委署隆德縣知
縣於衝途要務實有裨益

福康安又奏言查官兵進剿逆匪自抵隆德縣後
節次拿獲活口及投出回匪除於軍營審明正法

外尚有二百三十餘名俱經陸續解交隆德縣收
禁嗣以此等俱係曾經從逆之犯人數衆多未便
久羈囹圄經臣飭令臬司陳步瀛即於解到各犯
內擇其人稍明白稔悉賊營情形者酌留數人解
京備訊仍嚴行鎖鑰毋致稍有疎失其年歲幼小
者暫行羈禁聽候酌辦外其餘各犯審訊明確一
面錄供詳報一面即行正法茲據該司稟稱軍營
解到人犯前後共二百三十九名遵即逐一提訊

除馬世忠劉天祿馬成格惠明見四犯畧知賊營
情形俱嚴行鎖鑰留備解京馬元一等四十三名
均年歲幼小暫行監禁候辦外其餘蘇進魁等一
百九十二名俱訊係久經從逆情罪重大之犯均
應概予駢誅隨於六月十四日飭委平涼府知府
王立柱慶陽府知府王彞憲鎮原縣知縣胡謨會
同都司楊宗澤等將該犯等均行處斬訖並密飭
該縣預掘大坑三處派撥弁兵週圍防護每起十

名分作三處辦理該犯等俱俯首就戮民情快忭
等語臣覆加查核謹將業經正法并暫行監禁各
犯分別開列清單進

呈均奏入

上命軍機大臣傳諭阿桂福康安曰據福康安奏現在
多放卡座開挖溝壕俟將東南山腿佔得即可設法
斷其水道並乘勢進逼賊巢等語所辦均為妥協惟
所稱賊人取水係在石峯堡西南礮下河甚寬廣貼

近堡邊我兵尚不能進前斷絕現選派好鎗手伺賊
入下礮即放鎗擊打等語此亦係一法但恐賊人仍
於官兵防範不到之時又復乘間下礮取水得資接
濟不免耽延時日所慮尚未為周密朕意既在石峯
堡礮下或係泉水亦未可定即係河水阿桂福康安
亦可設法派員前往囊沙遣其上流或竟開溝將下
流瀉往別處使賊無從汲水豈不更善著阿桂福康
安即商酌妥辦至此時賊勢已感藏匿堡內不過苟

延殘喘官兵進剿自應計出萬全不必欲速以致兵
丁或有損傷現在阿桂所帶京兵早抵軍營屯練降
番亦俱到齊阿桂與福康安會同商辦兼之大兵雲
集賊人聞風膽落無難迅速殲除若已將賊匪剿捕
淨盡固屬甚善倘賊竟敢仍前死守官兵四面圍堵
絕其竄逸之路賊人糧食匱乏又無從取水飲食俱
絕自可不攻而潰阿桂福康安此時轉宜倍加慎重
不必輕進即如屯練甫經到營打仗即已陣亡一名

殊屬可惜著阿桂福康安優加賞恤其餘屯練降番
奮勉可嘉前已有旨賞給錢糧一月著再賞給一次
以示獎勵至現在尚未出伏天氣炎熱朕心甚為軫
念恐官兵或致傷暑業經由驛發去御藥房所製定
中平安丸藥各二千丸以備散給官兵祛病之需福
康安接到後仰體朕意如何分散及該處氣候何如
並著奏聞以慰廑念又據奏馬昇貴家內所挖地窖
深長至三五丈不等斷非數人所能開挖其所供並

未告知伊孫馬如林馬如海之處亦不可信著傳諭
阿桂福康安於事竣後親往履勘並將各犯等種種
謀逆情由訊訪確實究出黨羽按名查拿嚴辦勿稍
姑息其挖窖年月以及該州王琮是否自行盤獲之
處亦當逐一秉公確查據實覆奏至馬文燾既在縣
具稟該縣鍾潤即當善為慰諭並曉以不可從逆大
義或將馬文燾傳到縣中扣留以遏其從逆之謀何
得一無辦法惟以馬文燾次日即行從逆為詞為沉

擱不報卸罪地步著福康安即將鍾潤革職拿問委員迅速解赴熱河審明治罪並將馬文燾原稟一併進呈又據奏馬世忠等四犯畧知賊營情形預備解京等語馬世忠等既知賊營情形則起事根由該犯等亦必知悉福康安曾否向其詳細研鞫著即錄供據實覆奏朕前降諭旨令將拿獲賊目解送審訊亦不過欲明白賊人起事原委並究出勾結賊黨以便盡法懲治若解送之犯太多沿途照料恐難周到除

馬文燾馬昇貴馬漢龍等已有旨諭令解送外著傳諭阿桂福康安嗣後拿獲賊犯止須揀其緊要頭目如馬阿渾大通阿渾張阿渾數人可備審訊者解送熱河訊供其餘即於軍營一面審明起事根由錄供具奏一面即行正法勿任稍稽顯戮其監禁年歲幼小之賊屬馬元一等四十三名俱係應分賞為奴之犯但福康安係陝甘總督及本省地方文武各員均不可分賞致犯屬仍得留於甘省此外如五岱暨巴

圖魯侍衛等事竣後回京以及別省在甘協勦之員俱可各分賞一人為奴倘將來拿獲幼小犯屬尚多即可賞給屯練降番各兵丁為奴令其嚴加役使也至浦霖因其究係生手是以將伊調任安徽陳步瀛此次籌辦一切尚屬周妥已將該按察使簡放甘肅布政使福康安就近委辦各件更當得力

同日福康安又奏言查五岱等前經帶兵於伏羌雲霧山數次剿賊甚多誠如

聖諭頗有起色臣留心體訪彼時雖係五岱總理軍營
事務而一切皆公同商酌辦理其伏羌擊退賊匪
係剛塔帶兵先到至雲霧山首先帶兵進撲搶得
賊人所佔山梁奮勇殺賊則係阿爾薩郎與剛塔
蘇靈三人最為出力李侍堯亦知畏懼同五岱帶
兵策應皆由屢奉

諭旨訓飭誨示是以人人皆知愧奮感激精神漸能振
作奏入報

聞

三十日癸丑

上命軍機大臣傳諭阿桂福康安曰此次逆回滋事前據剛塔李侍堯奏稱首犯係小山田五但思田五於上年冬本年春間始製辦矛子庫刀等物而現據福康安查明賊人於四十六年即修理石峯堡上年又加葺整固是其逆謀轉在田五之前况田五居住小山離石峯堡約有二三百里之遙安能遠赴該處兩

次興修且石峯堡為賊人巢穴其中所有糧食器械等物自必以漸存貯備辦田五既不居住該處平時又有何人在彼製造運貯調度一切看來田五亦不過賊中頭目如張阿渾楊填四者特因舉首有人該犯知逆謀敗露遂爾先行舉事倉猝生變若該犯果屬賊首則伊既經自戕賊衆即當紛紛潰散安能復行四處勾結即云田五斃後賊營內尚有李鬍子馬鬍子二人諒該二犯彼此不能相下則石峯堡底店

之賊又安能咸聽其指使其中必另有為首之人為
賊衆所服從一切修堡挖窖打造器械蓄積糧食等
事俱係該犯主謀暗遣黨羽分投備辦並訂期起事
此係勦辦逆回第一緊要情節福康安既拿獲賊目
馬壯父子等何不向其詳細訊明著傳諭阿桂福康
安務即將拏獲賊犯嚴訊此事究係何人為首之處
迅速錄供具奏至馬文燾曾於五月十七日遣人赴
隆德縣稟報朕初意尚欲免其一死但思該犯於十

七日赴縣具稟十八日即率衆從逆明係甘心附賊
故投此稟以為日後被獲時卸罪地步不然即係馬
文燾知該縣鍾潤懦怯無能故以此恐嚇懈其隄防
而該縣亦即被其嚇詐茫無措置所有該犯原稟甚
關緊要著傳諭阿桂福康安即速查出由驛進呈至
所稱馬文燾十八日從逆之處究係如何情節或係
該犯率衆前往石峯堡迎賊或係帶同賊人攻擾城
池著阿桂福康安再會同逐一研訊務得確情勿任

絲毫遁飾

七月初一日甲寅阿桂福康安奏言竊臣阿桂自
豫入秦一路民情甚屬寧貼茲於二十三日行抵
軍營將石峯堡形勢詳加察看該處在萬山之中
三面皆係懸崖峭壁惟東南山包地勢稍平為賊
人門戶賊匪四處挑挖深壕數重以圖據險自守
惟有仰遵

訓誨四面圍攻嚴密堵截前經臣福康安與海蘭察等

籌辦於周圍各山梁安營二十餘處分派將領帶
兵駐守俾聲勢聯絡並於營盤相隔處所多放卡
座剗挖溝壕期於彼此接連使賊人無路可竄已
屬周妥臣思賊人佔居石峯堡為負隅死守之計
若率大兵從堡前進撲勢屬仰攻且上有深壕數
重賊人藏匿壕內放鎗投石恐損傷官兵轉失威
重惟有將攻圍之處愈加逼近設法斷其水道用
大砲轟擊賊營製造火彈拋擲賊壕焚燒令其不

能藏身預先派定各路官兵俟有可乘之機即合力進攻一鼓殲擒可期得手至賊巢內男婦聞有數千其糧食係從附近村庄搶掠運回藏貯想亦無多而此時周圍俱有官兵亦斷無為賊賫送糧食之人不能支持多日且將來水道一斷更可不攻自潰臣揣度事勢尚易集事至賊匪起事之初似以蘇四十三前事為戒不肯坐守一處四出煽誘勾結攻擾劫掠竄徙不定出沒無常而其將家

口先送至石峯堡究以此為巢穴今既計窮力竭
釜底苟延則仍不出蘇四十三死守華林之故智
數日內汲水之路一斷石峯堡即成絕地此皆逆
犯罪大惡極天奪其魄故得聚而殲旃此外各處
雖尚有零星賊匪業經臣福康安派兵前往搜捕
連日官兵搜獲及百姓擒送者絡繹不絕總之巢
穴一傾餘黨自無難勦除淨盡再臣阿桂由陝入
甘沿途所見庄稼彌望青葱臣歷數從前往來甘

省九次未有如此之茂盛民情歡躍定致綏豐臣
福康安身任地方尤深慶幸奏入

上命軍機大臣傳諭阿桂福康安曰據阿桂等奏阿桂
於二十三日行抵軍營察看石峯堡形勢惟有將攻
圍之處愈加逼近設法斷其水道用大砲轟擊賊營
製造火彈拋擲賊壕焚燒令其不能藏身等語前以
賊勢已威諭令阿桂福康安此時轉不必欲速宜籌
畫萬全總以賊人悉數殲擒官兵不致傷損方為妥

善現在續派京兵俱已前赴甘省協勦兵力愈多想
勦除更易至賊雖挑挖深壕以圖據險自守官兵何
不拏柵前進從前阿桂平定金川時即用過此法若
可照辦阿桂福康安即當妥酌辦理並遵前旨派員
前往賊人取水處所於上下流囊沙開溝將石峯堡
下之水瀉往別處則賊人水道一斷有食無從下咽
更可不攻自潰至用砲轟擊並拋擲火彈雖亦係一
法但究以生擒一二人俾得訊明起事根由及從逆

黨羽以便盡法懲治況賊勢日就窮蹙凡所脅從者
豈肯尚為之抗拒堡內糧食又豈能供數十人之坐
食是賊衆方將畏懼思散阿桂福康安何不趁此權
為安撫俟其出降將緊要賊目生致一面訊取起事
主謀根由一面解送熱河備訊但受降如受敵阿桂
福康安仍當慎之又慎至石峯堡賊匪勦盡後阿桂
福康安務遵前旨趨京兵及山陝各兵撤回之便或
即就近親赴底店固原等處將賊人種種逆蹟詳細

履勘並究出黨羽按名拏辦阿桂等務須逐一妥辦
剷絕根株以靖地方不特福康安係陝甘總督責任
綦重即阿桂既承辦此事亦斷不可急於完事稍為
姑息也

上又命軍機大臣傳諭阿桂福康安曰阿桂行抵石峯
堡軍營迄今已數日於此次逆回滋事李侍堯剛塔
二人辦理貽誤之處自必訪詢確實朕意此案剛塔
之罪尚輕於李侍堯緣從前蘇四十三勦滅後所有

善後一切卽責成李侍堯妥協辦理乃前據福康安
查奏賊匪於四十六年卽修理石峯堡上年五月又
加葺治整固而各處逆回訂期起事亦衆所共知且
甘省回民平昔恣肆豪橫欺凌民人等語李侍堯在
各省總督中素稱明幹今回匪如此逆謀彰著伊非
不能覺察嚴辦者何至安坐省城竟同聾瞶況甘省
回民雖多亦當設法籌辦豈得以希圖目前無事致
令日益放縱釀成事端乎是李侍堯之養賊養癰始

終貽誤朕亦不能曲為之解至剛塔在馬家堡放賊
翻山逃竄四出滋擾唯知在後尾追毫無籌畫是即
其罪無可追但伊甫任固原提督田五等即被首舉
事尚能射賊受傷又雲霧山打仗時剛塔與阿爾薩
朗蘇靈三人最為出力罪尚可原特其從前疎於防
範之處咎實難辭而較之李侍堯究可稍從未減也
朕所見如是著阿桂再會同福康安秉公詳查務歸
至當以憑定讞

同日圖薩布奏言竊臣於六月十一日將頭起京
兵護送出陝境茲查二三四起官兵均間一日按
站抵陝其應需車馬騾頭臣督同地方官如數應
付凡遇尖宿站所一切店舍食物悉係寬為預備
隨到隨即安頓供支現當伏雨時行臣誠恐灞澮
涇渭等河水勢漲發復經多調船隻水夫按起設
法過渡兼之兵丁乘騎長騾行走較為便捷沿途
無滯各起兵丁俱屬歡欣前進極為安靜今臣護

送第四起官兵於六月二十四日抵長武臺次早
照料起程前赴甘省訖查此次赴甘京兵應用戰
馬以及鑼鍋帳房箭枝等項俱經撫臣畢沅在於
西安滿營挑備解送現又辦解乾糧俾資裹帶其
火藥鉛丸尤為軍前急需之物臣隨將前次解貯
長武備調藥鉛火繩亦即就近派委員弁管解隨
同未起京兵運往餘再陸續撥運以裕軍用至近
日官兵圍攻石峯堡逆回困守巢穴日就窮蹙登

底遊魂指日即可洗戮以彰

國憲臣已飭令各軍臺多挑壯健馬匹預備馳遠捷
音再陝省東西大路州縣皆有回民聚處臣沿途
察看現俱安分守法併各處百姓聞賊回日就誅
鋤人心痛快愈覺安堵如常足以仰慰

聖懷

同日王昶奏言臣竊查長武一路為通甘省涇州
大路現當進剿逆回一切官兵過境及遞送軍裝

等項皆由於此所有應用車馬等項必須先事預籌庶不至稍有遺悞臣自抵長武查看沿途馬匹均為臆壯足數而額設人夫亦皆足資運送查自五月以來先經甘省調出提標西鳳各營嗣後派調西安滿洲駐防及軍標撫標最後山西官兵共計六千名或間日一起或每日一起均已照例供應陸續馳赴軍營至京師勁旅來抵潼關先經撫臣議於華陰首站給與長騾直入甘境又經藩司

圖薩布沿途照料臣亦督同各站員分設飯棚營盤以資官兵飯食住宿是以迅速趨行極為安靜

今於二十五日業經全數過境前抵涇州至此次甘省軍需多資陝省協濟三旬之內共計解出採買協甘站馬兩次一千匹又挑赴軍營戰馬一千匹以及火藥鉛丸大小砲位帳房箭枝乾糧炒麵餉鞘錢文等項為數繁多俱係軍營要件臣即於各官兵行走之暇撥給車馬或直送軍營或分別

留貯平涼一帶俱已源源飛運足供應用至於往來文報尤關緊要臣嚴飭各站臺員弁亦皆按照時刻晝夜星馳並無稽滯均奏入報

聞

初三日丙辰

上命軍機大臣傳諭阿桂福康安曰現在逆回將次辦竣而查辦賊黨為善後第一要著此次田五等聚眾滋事即係蘇四十三勦滅後李侍堯辦理未盡所留

餘孽將來阿桂福康安查辦匪黨時自當剷絕根株
永除後患但若因回匪滋擾遂槩行查辦轉非綏靖
地方之道此事不可不慎重辦理阿桂福康安俱係
能事之人又在彼親見一切情形自必預為籌計此
時官兵已將賊犯圍住不值輕進想竣事或尚需數
日著阿桂福康安公同熟商務將除盡孽根奠安良
善一勞永逸之計妥議具奏至阿桂等前奏賊人於
堡外四處挑挖深壕賊既挖壕自守官兵又四面圍

堵自不能復往外尋覓糧食其堡內賊衆男婦不下數千人從何得食且數千人從何而進即云從前在附近村店搶掠藏匿亦豈能似此支持多日明係平時陸續運貯多蓄盜糧李侍堯固不能辭養癰貽患之罪而該處地方官漫無覺察其罪尤不可追已節次傳諭阿桂福康安查明叅奏此時阿桂等既須相機進勦即當於籌辦之暇就近將賊人修堡聚糧各情節係何員任內之事逐層查訊確實先行叅奏治

罪

初四日丁巳阿桂福康安奏言臣等攻圍石峯堡
賊巢安卡挑壕斷賊水道現在公同商酌周視地
勢賊人取水係在石峯堡西北及東南崖下兩處
河流貼近堡下山邊惟有將石峯堡西北東南山
腿佔得即可斷絕賊人水道並遵照

硃筆圈出指示之處選派官兵拏卡進逼周圍刨挖溝
壕一道彼此接連再加一層堵圍愈益嚴密賊匪

斷不致有一名免脫但此係賊人性命所係必盡
力守禦須整頓兵威乘勢勦殺並多備鋏鐮人夫
一面預備打仗一面挖壕拏卡因於二十五日寅
刻發兵臣福康安與海蘭察五岱旺沁班巴爾保
寧成德三德蘇靈阿爾薩朗法靈阿泰斐英阿福
寧明亮春寧等帶領巴圖魯侍衛章京率領京兵
各營奮勇官兵阿拉善兵屯練降番老教土兵分
隊預備臣阿桂督催策應外刻我兵搶至堡前堡

後遂將西北東南兩處山腿佔得賊匪並不敢出
堡迎拒維時海蘭察帶同明亮春寧巴圖魯侍衛
各員等將所領官兵埋伏兩旁溝礮之下乘賊追
壓繞出從中攔截即可痛加勦殺因催令兵夫立
持鍬鋤刨挖溝壕逆料賊匪見挖壕斷伊水道定
形惶急且止係人夫無兵保護自必乘間下壓希
圖衝散我兵即可突出剿殺不但制賊死命亦誘
賊之一法無如賊人自恃有深壕數重諒官兵一

時不能超越仍藏匿壕內放鎗投石始終不敢出
迎我兵遂一面拏卡一面挖壕申刻雷雨大作亦
未少休並恐賊人乘雨下衝益加嚴整自辰至戌
周圍石峯堡十餘里共拏卡二十餘座剗挖溝壕
一道深寬各一丈四面接連即派奮勇官兵及川
省屯練令駐各卡堵守又防賊人於夜間衝突鋌
而走險海蘭察等於京兵及阿拉善兵內選派好
鎗手數百名排立預備終夕巡察稽查賊匪亦毫

無動靜至賊人取水處所在官兵卡壕之外賊匪
斷不能越過偷汲即遇天雨用器皿接取量亦無
多且山形陡凸並無溝坑不能存積斷難供數千
人飲用數日之內定形渴憊此時派兵進撲亦可
期得手但恐困獸猶鬪我兵轉有損傷惟有仰遵
訓諭倍加慎重計出萬全總期賊人不致一名逸出再
查石峯堡四面並無石峽賊人欲將官兵誑入之
語俱係傳聞毫無確據從前傅玉所駐鹿鹿山係

石峯堡南面相隔有二十餘里僅可以牽綴賊勢
今臣等搶佔石峯堡山腿周圍挑挖溝壕擊立卡
座逼近石峯堡賊人所挖溝壕不過一鎗所及之
地現在石峯堡西北山包已派五岱阿爾薩朗帶
同侍衛官員率兵嚴防其東南山腿海蘭察帶同
巴圖魯侍衛同明亮等在彼駐守嚴防臣福康安
復不時往來巡查統計四面卡座溝壕周圍不過
十里每日可以稽查數次呼應實為迅速賊人斷

無從竄逸

阿桂福康安又奏言查底店回人前見官兵勢盛
乞降其心實為叵測臣福康安當即派兵將投出
之二百餘犯分起押解隆德縣交臬司陳步瀛收
禁因人數較多飭令該司審明後即同節次拏獲
賊匪在該縣分別正法至底店乞降之土著回民
雖名為投順究係俱經從逆之犯已於移營石峯
堡時酌留俞金鰲帶兵在彼駐劄彈壓俟賊巢掃

滅時遵照

諭旨於京兵及山陝各兵撤回時將該犯等及伊家屬
分別辦理務使從逆之犯殲誅淨盡良善回民不
致聞而驚懼方為妥善統俟酌定機宜再行具

奏至馬文燾一犯身係武舉膽敢與逆回交通勾結
雖自行投出法所不赦臣福康安現已遴派精壯
兵弁護解熱河以備審訊均奏入

上命軍機大臣傳諭阿桂福康安曰官兵已于二十五

日將石峯堡西北東南兩處山腿佔得週圍十餘里
共拿卡二十餘座刨挖溝壕一道四面接連堵守賊
人取水處所在官兵卡壕之外賊匪斷不能越過偷

汲阿桂等辦理均為妥協想捷音定在早晚間矣此
時賊勢愈感自不虞其詐降生變但更當嚴防如賊
見官兵圍急出堡乞降阿桂福康安竟不妨權為安
撫轉可得其為首活口以便嚴訊致反真情若徒事
派兵進攻如從前勦辦蘇四十三時概行殲戮反無

從詳細審訊盡法懲治也又另摺奏稱底店回民均有從賊逆蹟俱不可赦宥俟京兵及山陝各兵撤回時再行相機籌辦所慮甚是阿桂福康安於石峯堡辦竣後即可赴京兵及山陝各兵撤回之便赴該處詳悉查辦仍遵前旨將拿獲賊犯嚴究起事各逆謀如有被賊供出者不論蘭州河州各處匪黨務即按名拿辦以淨根株不可稍存姑息至馬文熹一犯前已有旨派法靈阿迅速解送熱河諒此時阿桂福康

安早經接奉前旨將馬文燾嚴加鎖鑰交法靈阿妥
速解送也

上又諭內閣曰此次老教土司兵一經檄調隨征俱各
爭先奮勉自當從優支給口食以示體恤况該土兵
等與屯練降番相仿屯練等月支既已優厚所有檄
調隨征之老教土司兵丁應得分例亦著加恩照屯
練降番之例一體支給其上屆勦除撒拉爾逆回曾
經支給之項並著該部查明一律准予開銷用昭朕

軫念土兵優加體卹之至意

臣等謹按老教土兵與逆回生共鄉閭見其肆出

滋擾同深義憤敵愾爭先一經檄調踴躍前驅

非若屯練番兵遠赴征調應優支口食也乃蒙

我

皇上特降

恩綸照屯練等月支之例概令從優支給豈惟一視同

仁抑且

鴻施逾格凡夫宣力戎行者人人感奮挾纊騰歡所以
士氣揚而賊氛迅掃歟

同日阿桂福康安又奏言查汗隴一帶此時斷無
虞賊人竄往自可毋須屯駐多兵臣等公同商酌
即將太原鎮福敏泰所帶兵二千名行令撤回本
省就現在情形而論掃蕩賊巢之後其賊匪經過
地方所有曾經從逆之犯必須竭力搜捕痛加殲
戮不得量留多兵以資彈壓是以此時軍營兵

力雖屬有餘臣等未即議撤卽敷倫泰所駐汧隴一帶地方現尚有敗逃餘賊經該處拏獲者是以仍令暫駐俟酌看光景再令撤兵回任奏入報

聞

同日福康安奏言竊查甘省自逆回滋事以來軍需一切費用較繁庫貯錢文不敷支用前經李侍堯奏請照乾隆四十六年之例調取陝省局錢一十萬串以備急需臣查各路官兵雲集甘省需用

雖繁亦應樽節籌辦李侍堯原調錢一十萬串為
數未免過多現在大兵圍困賊巢尅日可期撲滅
撤兵在即尤未便多撥錢文致滋糜費因飭令辦
理軍需各員通盤籌算臣復親加確核現在陝省
陸續運解錢五萬串儘足敷用臣已咨明撫臣畢
沅并札飭藩司浦霖將陝省解到錢文運貯平涼
府庫派委妥員專司支放務令核實報銷不致稍
有浮冒再軍營糧草最關緊要臣到甘後即多方

籌畫扣筭各州縣道里遠近陸續接運以期無悞
軍行至火藥鉛彈等項先將各營存貯者運送并
嚴飭藩臬兩司及各該道府多為籌備上緊督催
提辦自進兵以來源源接濟並無缺乏奏入報



欽定石峯堡紀畧卷十三